



Neviim (prophètes) - Josué

Chapter 5

- 5,1 ויהי כשמע כל-מלכי האמרי אשר בעבר הירדן ימה, וכל-מלכי הכנעני אשר על-הים, את אשר-הוביש יהוה את-מי הירדן מפני בני-ישראל, עד-עברנו (עברם); וימס לבבם, ולא-היה בם עוד רוח, מפני בני-ישראל. {פ}
- 5,2 בעת ההיא, אמר יהוה אל-יהושע, עשה לך, חרבות צרים; ושוב מל את-בני-ישראל, שבית.
- 5,3 ויעש-לו יהושע, חרבות צרים; וימל את-בני ישראל, אל-גבעת העברות.
- 5,4 וזה הדבר, אשר-מל יהושע: כל-העם היצא ממצרים הזכרים כל אנשי המלחמה, מתו במדבר בדרך, בצאתם, ממצרים.
- 5,5 כי-מלים היו, כל-העם היצאים; וכל-העם הילדים במדבר בדרך, בצאתם ממצרים--לא-מלו.
- 5,6 כי ארבעים שנה, הלכו בני-ישראל במדבר, עד-תם כל-הגוי אנשי המלחמה היצאים ממצרים, אשר לא-שמעו בקול יהוה: אשר נשבע יהוה, להם, לבלתי הראותם את-הארץ אשר נשבע יהוה לאבותם לתת לנו, ארץ לבת חלב ודבש.
- 5,7 ואת-בניהם הקים תחתם, אתם מל יהושע: כי-ערלים היו, כי לא-מלו אותם בדרך.
- 5,8 ויהי כאשר-תמו כל-הגוי, להמול; וישבו תחתם במחנה, עד חיותם. {פ}
- 5,9 ויאמר יהוה, אל-יהושע, היום גלותי את-חרפת מצרים, מעליכם; ויקרא שם המקום ההוא, גלגל, עד, היום הזה.
- 5,10 ויחנו בני-ישראל, בגלגל; ויעשו את-הפסח בארבעה עשר יום לחדש, בערב--בערבות יריחו.
- 5,11 ויאכלו מעבור הארץ, ממחבת הפסח--מצות וקלוי: בעצם, היום הזה.
- 5,12 וישבת המן ממחבת, באכלם מעבור הארץ, ולא-היה עוד לבני ישראל, מן; ויאכלו, מתבואת ארץ כנען, בשנה, ההיא. {ס}
- 5,13 ויהי, בהיות יהושע ביריחו, וישא עיניו וירא, והנה-איש עמד לגדו וחרבו שלופה בידו; וילך יהושע אליו ויאמר לו, הלנו אתה אם-לצרינו.
- 5,14 ויאמר לא, כי אני שר-צבא יהוה--עתה באתי; ויפל יהושע אל-פניו ארצה, וישתחו, ויאמר לו, מה אדני מדבר אל-עבדו.
- 5,15 ויאמר שר-צבא יהוה אל-יהושע, של-נעלך מעל רגלך, כי המקום אשר אתה עמד עליו, קדש הוא; ויעש יהושע, כן.